

**Agong Terima Watikah Pelantikan Enam Wakil Asing Ke Malaysia
Bernama
27 Mei, 2013**

KUALA LUMPUR, 27 Mei (Bernama) -- Yang di-Pertuan Agong Tuanku Abdul Halim Mu'adzam Shah hari ini berkenan menerima watikah pelantikan daripada enam duta dan pesuruhjaya tinggi asing ke Malaysia di Istana Negara, di sini.

Mereka ialah Abdulla Mattar Khamis Al Mazrouei dari Emiriyah Arab Bersatu (UAE), Ahmed Faouzi (Maghribi), Archbishop Joseph Marino (Holy See), Qaley Ali Oglu Allahverdiyev (Azerbaijan), Judith St George (Kanada) dan Dr Anwar Abubaker Elfeitori dari Libya.

Tuanku Abdul Halim dan Raja Permasuri Agong Tuanku Hajah Haminah kemudian berkenan menerima menghadap enam ketua perwakilan asing ke Malaysia itu.

Turut hadir Timbalan Menteri Luar Datuk Hamzah Zainuddin dan Timbalan Ketua Setiausaha Kementerian Luar Datuk Husni Zai Yaacob.

Abdulla Mattar Khamis, 52, yang dilantik sebagai Duta Tetap UAE ke Malaysia pada April lepas, kini dilantik sebagai Duta Besar UAE ke Malaysia.

Ahmed Faouzi, 57, pula adalah diplomat dari Rabat yang dilantik sebagai Duta Tetap Maghribi ke Malaysia. Beliau pernah menjadi Duta Maghribi ke Ivory Coast dari 2008 hingga 2012.

Archbishop Joseph Marino, 60, adalah Duta Besar pertama Vatican (Holy See) ke Malaysia selepas pembentukan hubungan diplomatik antara Malaysia dan negara itu pada 18 Julai 2011. Vatican mewujudkan kedutaannya di Malaysia pada Julai 2012.

Qaley Ali Oglu Allahverdiyev, 63, dilantik sebagai Duta Tetap Azerbaijan ke Malaysia. Beliau pernah menjadi kaunselor di Kedutaan Azerbaijan di Turki, Indonesia dan Qatar.

Pesuruhjaya Tinggi Kanada ke Malaysia Judith St George, 54, dilantik untuk menggantikan Randolph Mank yang tamat tempoh bertugas pada 7 Sept tahun lepas.

Dr Anwar Abubaker Elfeitori, 49, pula merupakan Menteri Pengangkutan dan Komunikasi di bawah pengawasan Majlis Eksekutif Libya dari 2011 hingga 2012 sebelum dilantik menjadi duta ke Malaysia.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=952192>